

Horizon



PROGRAM Iftar@KL dihidupkan kembali di tengah ibu kota selepas dua tahun tidak diadakan ekoran pandemik Covid-19.



SOLAT berjemaah antara pengisian kerohanian yang dimasukkan pada program Iftar@KL di Dataran Merdeka, Kuala Lumpur baru-baru ini.

Iftar@KL kembali secara fizikal

Oleh MOHD. SHAZWAN YUSOP

SELEPAS dua tahun tidak diadakan, Kementerian Pelancongan, Seni dan Budaya (MOTAC) melalui Jabatan Kebudayaan dan Kesenian Negara (JKKN) kembali menganjurkan program Iftar@KL.

Pada 2020, pelaksanaan Iftar@KL terpaksa dibatalkan, manakala tahun lalu dibuat sekadar secara online disebabkan penularan pandemik Covid-19 dalam kalangan masyarakat.

Pada tahun ini, acara tahunan setiap kali tibanya Ramadan itu dilaksanakan bermula 16 dan 17 April lalu sebelum diteruskan pada 23 April ini di Jalan Raja, Dataran Merdeka, Kuala Lumpur.

Tujuan utama acara itu diadakan adalah untuk mengimarah Ramadan sebagai bulan ibadah dan keprihatinan sesama insan melalui pengisian pelbagai aktiviti menarik.

Ketua Pengarah JKKN, Mesran Mohd. Yusop berkata, Iftar@KL diharap dapat membantu mengeratkan hubungan antara kaum di negara ini.

"Pada tahun ini, Iftar@KL memasuki tahun ke-10 pelaksanaan selepas dimulakan pada tahun 2012. Menariknya, ia kali pertama diadakan selepas dua tahun tidak dianjurkan secara fizikal.

"Aktiviti ini mampu menyerlahkan kebudayaan dan kesenian Islam di Malaysia kepada kaum lain serta pelancong antarabangsa," katanya.

Majlis itu dimeriahkan dengan kehadiran Menteri Pelancongan, Seni dan Budaya, Datuk Seri Nancy Shukri yang meluangkan masa beramah mesra dengan orang ramai yang hadir.

Turut hadir Menteri Wilayah Persekutuan, Datuk Seri Dr. Shahidan Kassim dan Datuk Bandar Kuala Lumpur, Datuk Seri Mahadi Che Ngah.



Tradisi berbuka secara bersila dengan beralaskan tikar ini cukup unik kerana orang ramai dapat berbuka di Dataran Merdeka sambil menikmati pemandangan indah ibu kota."

MESRAN MOHD. YUSOP

Uniknya Iftar@KL ini, ia berkonsepkan tradisi berbuka puasa secara duduk bersila beralaskan tikar yang turut disertai pelancong asing.

Menurut Mesran, tradisi itu cukup unik kerana orang ramai dapat berbuka di Dataran Merdeka sambil menikmati pemandangan indah ibu kota.

"Pada tahun ini, Iftar@KL kembali

diadakan di depan Dataran Merdeka iaitu bertentangan dengan Bangunan Sultan Abdul Samad. Sebelum ini, ia diadakan di depan bangunan Dewan Bandaraya Kuala Lumpur (DBKL)," ujarnya.

Penganjuran Iftar@KL mendapat kerjasama DBKL, Jabatan Agama Islam Wilayah Persekutuan, Persatuan Seni Budaya Putra serta disokong Jabatan Kemajuan Islam Malaysia.

Rakan penganjur pula terdiri daripada Majlis Agama Islam Wilayah Persekutuan, Pusat Pungutan Zakat, Kuala Lumpur Food Truck Entrepreneurs Association dan Masjid Jamek Kampong Bharu.

Kata Mesran, pengisian Iftar@KL 2022 tidak banyak bezanya berbanding

penganjuran pada tahun-tahun sebelum ini dengan acara bermula seawal pukul 9 pagi hingga tengah malam.

"Antara pengisian menarik adalah majlis berbuka puasa, penyediaan dan pengagihan bubur lambuk, solat maghrib, isyak dan tarawih secara berjemaah serta tadarus al-Quran oleh 80 pelajar tahfiz sekitar Lembah Klang.

Sepanjang dua hari program berlangsung, Iftar@KL berjaya mencatat kehadiran pelawat sekitar 8,300 orang. Jumlah tersebut bagaimanapun masih rendah berbanding tahun-tahun sebelum ini.



BERBUKA puasa secara bersila beralaskan tikar memberikan pengalaman berbeza terutama kepada pelancong asing.